

U SITU STORICU D'ALERIA : UNA ANTICA CITÀ RUMANA

© S. Aude Balloide Photo / CTC 2012



99

VUCABULARIU UTULE



© Ogerepus

CITÀ : spaziu urbanu in l'Antichità (è a campagna in giru) chì campa di modu indipendente.

DOMUS : parolla latina per designà una casa rumana tradizionale.

FORUM : piazza publica chì adunia a pupulazione per l'attività ecunomiche, pulitiche è ghjudiziarie.

SCAVAMENTI ARCHEULOGICHI : azzione di scavà a terra da truvà vistighe di u passatu.

LEGIONE : armata rumana.

RUMANIZZAZIONE : appiegazione di u modu di vita romanu à nant'à un territoriu annessatu.

VISTIGHE : segni di u passatu.



ATTIVITÀ

ATTIVITÀ 1: CUMU ANU CUNQUISTU A CORSICA I RUMANI ?

Puntelli :

- Futugrafia aerea di u situ d'Aleria
- Testu : Aleria, un esempiu di rumanizzazione
- Testu è maghjina : Roma è a so armata
- Testu : a Corsica durante l'invasione rumana

Documentu 1 : FUTUGRAFIA AEREA DI U SITU D'ALERIA



© S. Aude Balloide Photo / CTC 2012

MINIGHETTE & ARTIFIZII



Participà in scola, hè una bona !

Ma ùn vene micca faciule faciule di lampà si à piglià a parolla davant'à tutti.

Eppuru, participendu è sendu **attivu**, si ritene megliu e so lezziò (tandu ci hè **menu travagliu in casa**) ! Aiuterà dinù i cumpagni chì s'impauriscenu di parlà. È ùn ti scurdà chì s'è tù ti sbagli, ùn vole di... U maestru o a maestra hè quì per aiutà ti, micca per ghjucà ti à a risa !

Per sbuccà à parlà di più in scola, **prova** in casa, arrigistra ti per un dettu o dumanda à i to parenti di lascià ti parlà ind'è e butteghe, ind'è u duttore... Viderai, ùn hè micca cusì difficiule !



Ducumentu 2 : ALERIA, UN ESEMPIO DI RUMANIZZAZIONE

Prosper Mérimée hè u primu, in u 1840, ad avè pensatu chì u situ archeologicu d'Aleria, situatu à nant'à un pianu, sopr'à a piaghja orientale di a Corsica, era una antica cità romana.

Tandu ci hè statu un cantieru di scavamenti archeologici durante a prima metà di u XX^{esimu} (20^{esimu}) seculu. Anu messu à ghjornu u forum è a cità romana d'Aleria

Aleria hè stata cunquista da i Rumani in u 259 nanz'à Ghj.C. Cum'è à nant'à l'altri territori sottumessi, ci anu custruitu cità à nant'à u mudellu di a capitale soia : Roma.



© axellwolf / Adobe Stock

Legionariu romanu.

Ducumentu 3 : ROMA È A SO ARMATA

Durante tuttu u periodu di l'Imperu romanu, da a fine di u I^{mu} (1^{mu}) seculu nanz'à Ghj.C. à u V^{tu} (5^{tu}) seculu dop'à Ghj.C., l'armata romana era cumposta solu di sullati prufessionali è pacati chì s'eranu impegnati da per elli.

Solu i cittadini rumani pudianu entre in l'armata.

A so unità militare a più impurtante era a legione romana, cummandata da un legatu. Una legione cuntava circa 5 000 omi, spartuti in 10 cuorte.

Ogni cuorta era divisa in centurie, cummandate da centurioni.

E legione eranu di regula accumpagnate da truppe di cavalleria.

L'armata romana ùn hè micca ecchippata megliu ch'è l'altre armate, ma hè urganizata bè. E legione rumane ghjunghjenu cusì à vince armate sempre numerose di più.

Ducumentu 4 : A CORSICA MENTRE L'INVASIONE RUMANA

Mentre l'Antichità, a cità di Roma, in Italia, hà creatu una armata putente è ecchippata bè.

Disciplinata assai, st'armata seguitava una strategia precisa chì a rendia superiore à i so nimichi, chì luttavanu à spessu in disordine.

In u 259 nanzu à Ghj.C., i Rumani venenu di cunquistà Aleria. I Corsi ripiglianu u situ ma subitu dopu i Rumani u si ripiglianu torna.

Pè i Rumani, a cunquista di a Corsica hè stata una di e più dure. Hè durata guasi un seculu è hà dumandatu 8 spedizione. Hè Scipione Nasica chì compie sta cunquista, versu u 150 nanz'à Ghj.C. Hè unu di i so più belli tituli di gloria.

À a fine di u I^{mu} (1^{mu}) seculu nanz'à Ghj.C., i Rumani supranavanu cusì tutta l'aghja mediterranea. A Gallia hè stata cunquista cù a vittoria d'Alesia, in u 52 dop'à Ghj.C.



Eserciziu 1 :

Leghjite è usservate i documenti.

Eserciziu2 :

Avà, in gruppi di dui, rispundite à e quistione quì sottu :

1) Induve hè situatu u situ d'Aleria ?

2) Date dui aghjettivi da discrive l'armata rumana.

3) Quantu spedizione sò state necessarie à i Rumani per cunquistà a Corsica ?

4) In chì annata a Corsica hè stata cunquista è da chì capu rumanu ?

5) A Corsica hè stata cunquista nanzu o dopu à a Gallia da i Rumani ?



Eserciziu 3 :

Avà, mettimu in cumunu e nostre risposte per tene una stampa scritta.

Nutate quì ciò ch'ellu ci vole à ritene d'impurtante :

> Andà più luntanu :

• CUNNOSCE A CITÀ DI ROMA

A legenda dice chì a capitale di l'Imperu rumanu hè stata fundata in 753 nanz'à Ghj.C. da Romulus, figliolu di u diu di a guerra, Marzu, in a piaghja di u Latium.

C'era 7 culline chì supranavanu a valle di u Tiberu. À l'urigine, sò 7 rè à guvernà la. L'ultimu di sti rè, hè rimpiazzatu da dui cunsuli eletti. Si dice tandu ch'ellu hè u principiu di a Republica in Roma.

Roma diventa di più in più putente è face a cunquista di tuttu u Mediterraniu. Hè tandu ch'ellu si principia à parlà d'« Imperu rumanu ».



• CULTURA LITERARIA È ARTISTICA

Secondu a legenda, Romulus è Remus serebbenu i figlioli di u diu Marzu è di Rea Silvia. Or, à sta giuvanotta liata à a dea Vesta, l'era difesa d'avè i figlioli. Rea abbandona i so figlioli in un spurtellu lasciatu à fil'di Tiberu.

I picci sò raccolti da una lupa chì l'allatta è i cura. Un ghjornu, un pastore i trova è i si porta per allivà li. Da tandu, a lupa hè unu di i simboli di Roma.

À u to avisu, induve si pò vede sta statula di a Lupa cù Romulus è Remus ?



ATTIVITÀ 2 : ALERIA, CITÀ RUMANA ?

Puntelli :

- Infugrafia à nant'à Roma, capitale di l'Imperu romanu
- Futugrafia aerea di e vistighe di l'antica cità romana d'Aleria
- Pianu di u situ d'Aleria

Documentu 1 : INFUGRAFIA À NANT'À ROMA, CAPITALE DI L'IMPERU RUMANU


Roma, capitale di l'Imperu romanu

In l'Antichità, Roma hè una di e cità e più maiò di u mondu. Si sparghjè à nant'à 7 culline, à bor'di Tiberu, un fiume d'Italia. Conta più di 1 milione d'abitanti à u II^u (2^u) seculu.




U Forum

Hè u cor'di cità. I Rumani ci venenu à fà e so corse è à discute. Ci si trova dinù parechji munimenti è tempîi.



U Capitogliu

U tempîu maiò di Ghjupiteriu si trova in cima di sta cullina. E so porte sò cuperte d'oru è u so tettu hè fattu di coppe culore d'oru.




U Palatinu

I palazzi di l'imperatori coprenu sta cullina sana sana.




U Circus Maximus

Hè in stu circulu ch'èlle si passanu e corse di carri. Pò accoglie 250 000 spettatori ! « Maximus » vole dì « massimu », u più maiò, in latinu.




I bagni



I rampali


U Culiseu

Hè u più grande anfiteatru romanu. Spettaculi, esecuzione, lotte di gladiatore è d'animali sò urganizati.



L'acquidotti

Parechji acquidotti arreganu l'acqua in a cità. Da alimentà e fontane, i bagni è certe case.



U tempîu di Claudiu





Documentu 2 : FUTUGRAFIA AEREA DI E VISTIGHE DI L'ANTICA CITÀ RUMANA D'ALERIA



© S. Aude Balloide Photo / CTC 2012

Documentu 3 : PIANU DI U SITU D'ALERIA



© ArkeMine / CTC 2013

MINIGHETTE & ARTIFIZII



À parechji, simu più forti !

Quandu si travaglia in gruppu, in dui in trè o di più, sò tanti cerbelli chì riflettenu insieme è chì s'aiutanu ! Nun solu u travagliu cullettivu dà à spessu un risultatu superiore, ma aiuta dinù à sviluppà capacità utile utile à longu di vita.

Per un dettu, quandu si face un exerciziu cù un cumpagnu, hè primurosus di **parlà di l'idee soie è di difende le**, ma dinù di stà à **sente** a l'altru... È tuttu què senza liticà si puru, à le volte, senza esse d'accunsentu ! Si chjama què « **cuuperà** ».

Nanzu di principià, dite trà di voi cumu **sparte u travagliu** : ùn hè micca sempre utile di fà tuttu insieme, ma ugnunu deve avè una attività da fà. Una volta chì tutt'ugnumu hà fattu a so missione, **discutite di e vostre scuperte o di e vostre difficoltà**.

Dopu, pudete fà un **resu contu insieme** integrendu l'idee di tutt'ugnumu. **Hè mutivante assai di travaglià in gruppu !**



Eserciziu 1 :

Inseme, leghjimu è usservemu pianu pianu i documenti eppo' numinemu i munimenti rumani « aiutendu ci cù di a lista quì sottu :

Forum ; tempju ; capitogliu ; *domus*.

Eserciziu 2 :

In gruppi di dui, cumpletate stu tavulone à parte si da i documenti 2 è 3 è di l'indizzi quì sottu :

- U forum hè a piazza maiò di a cità, di forma rettangulare, hè situata à u crugia di dui carrughji principali. Ci si trova a basilica, u tempju, ecc.
- U tempju hè un bastimentu culussale custruitu in l'onore di una divinità è induve si vene à adurà la.
- U capitole hè un tempju dedicatu à e trè divinità maiò : Ghjupiteriu, Ghjunone, è Minerva. Hè situatu in faccia di u tempju è hà misure ancu di più maiò !
- Una *domus* hè un casone chì una parte hè a casa di i pruprietarii. Quì una *domus* occupa una parte maiò di u quartieru di u forum.

NUMERU PIAZZATU À NANT'À U PIANU	NOME DI U MUNIMENTU	CURREZZIONE
1		
2		
3		
4		

Ogni binomu dà e risposte trove. Dop'à una discussione cullettiva purtata da u maestru o a maestra, valutate o fate a currezzione di e vostre risposte.

Eserciziu 3 :

Avà, mettimu in cumunu e nostre risposte per tene una stampa scritta.

Nutate quì ciò ch'ellu ci vole à ritene d'impurtante :



ATTIVITÀ 3 : A VITA CUTIDIANA IN ALERIA

Puntellu :

- Appicciu cù i 6 ritratti da taglià

Eserciziu 1 :

Scuprimu insieme ste maghjine. Chì palesanu ?

Eserciziu 2 :

Avà, taglia e maghjine. Appiccica ogni ugettu in faccia di a so definizione in u tavulone quì sottu è nota u so nome sottu à a definizione.

<p>Sò un ugettu fattu in legnu o in avoriu venutu d'Africa o d'Asia. Ghjovu à ghjucà è eru assai spartutu ind'è i Rumani : puru l'imperatori ci ghjucavanu cù passione !</p> <p>> Sò</p>	
<p>Sò un ugettu per dà una pulita à l'arechje. Sò à spessu in legnu, à le volte in metallu. Sò l'antenatu di u sticcaru cutone !</p> <p>> Sò</p>	
<p>Sò un ugettu tondulu chì permette di dà lume in giru à mè, brusgiendu oliu. Sò à le volte fatta in terra.</p> <p>> Sò</p>	
<p>Sò in metallu (oru, argente, bronzu...). À nant'à unu di i mo lati, si trova u ritrattu di l'imperatore o à le volte di l'imperatrice. À nant'à l'altu latu, si vede un evenimentu particolare di l'epica induve sò stata creata. Sò un mezu di pacà.</p> <p>> Sò</p>	
<p>Sò tamantu stagnarone chì permette di trasportà liquidi (acqua, oliu...).</p> <p>Aghju una foma longa, in punta, da esse ziffata in a rena. Vicin'à a u tavulone di u ripastu, mi mettenu à nant'à un appoghju per tene mi dritta. In un locu cum'è a Corsica, induve u vinu hè una ricchezza, sò utule utule chì ghjovu à trasportà lu.</p> <p>> Sò</p>	
<p>Sò un ugettu di pulita. Ghjovu à perfumà.</p> <p>> Sò</p>	

Ingiru à ogni maghjina appiccicata secondu à stu codice di culori : in **rossu** l'ugettu chì tocca à i ripasti, in **turchinu** l'ugettu chì tocca à i ghjochi, in **giallu** quellu di u cummerciu, in **verde** l'ugetti chì tocanu à l'igiene, in **aranciu** quellu chì tocca à u cunfortu.



Eserciziu 3 :

Avà, mettimu in cumunu e nostre risposte per tene una stampa scritta.

Nutate quì ciò ch'ellu ci vole à ritene d'impurtante :

> Andà più luntanu :

• U LATINU À L'URIGINE DI U CORSU

A nostra lingua corsa hè furmata di parole d'urigne diverse. Ma a maiò parte di u lessicu vene da u latinu chì era parlatu in l'Imperu rumanu quindici à vinti seculi fà. Esempiu : a « scola » vene da *schola* in latinu, « catturà » di *captare*, u « mercatu » di *mercatus*, l'« ottimisimu » di *optimus*...

Da tandu, ci sò stati parechji aghjunti. Ma certe parole, per un dettu, in francese, ùn anu micca cambiatu da a rumanisazione di a Corsica è di a Gallia. Esempiu : e parole « et cetera », « gratis », « idem », « maximum », « minimum »...



RITENGU

- In l'Antichità, l'Imperu rumanu hè putente putente. Cù a so armata disciplinata è forte, l'Imperu hà conquistatu territorii in giru à u Mediterraniu.
- Subitu a fine di u II^{du} (2^{du}) è a metà di u I^{mu} (1^{mu}) seculu nanz'à Ghjesù Cristu, i Rumani s'impusessanu di a Gallia è a spartenu in pruvincie. Pè i Rumani, a conquista di a Corsica serà stata una di e più difficiule cù 8 spedizione. In u 259 nanz'à Ghj.C., i Rumani si piglianu Aleria in Corsica.
- À nant'à i territorii cunquisti, i Rumani creanu cità à nant'à u mudellu di Roma, a so capitale. Ritruvemu listessi bastimenti : i bagni, u forum, i tempii, i *domus*, ecc. Imponenu dinù u so modu di vita (igiene, ripasti, ghjochi...), i so dii, ecc., à tutti l'abitanti. Si chjama stu fenomenu a « rumanizzazione ».
- E vistighe di l'anziane cità rumane antiche, cum'è quella d'Aleria, permettenu di capì megliu u periodu di l'Antichità.